

施愚山全集

第一函
五十五册

施愚山先生學餘詩集卷之十六

七言古

青藤引

青藤書屋徐文長讀書處藤大如斗徐自稱青藤道人後為陳章侯毛冷陳歿數年而青藤為風雷所壞感而賦之

青藤青藤爾生幾百載幾見桑田與滄海霜根拔地石谿斜翠葉垂天雲霓下根伏積雪上幹棲真宰小山叢桂不敢望若木扶桑勢相抗葛陂仙叟騎作龍襄陽老顛拜為丈千年盤鬱精靈開腹空火起轟奔雷嵯峨石柱倒燦爛金臺摧豐隆行歎息屏翳坐徘徊嗟爾青藤胡為乎頽哉昔日天池讀書處狂歌大叫倚藤樹又聞丹青老蓮子陳章侯自號老蓮解衣醉卧呼不起蘭亭客散纏荆榛風吟雨嘯空悲辛自古才人所託迹會能白日生霹靂青藤青藤我欲南登石梁遊金庭策爾為杖兮爾騫騰

象山謠懷同年顧雙九也

象山令居東海中往來飄忽隨天風夜見魚眼波濤紅捨舟登岬豺虎窟伏莽健

兒復馳突夾路杈枒堆白骨城中罷市無居民秣馬無粟囊無薪冠蓋使者坐生
嗔為語象山令請君勿太息昔何白晢今驚黑挂冠高枕何可得

怪風行

海州白晝黃塵昏烈風倒海搖山根城崩一角塞城門兒童大叫相追奔有客擁
衾卧高閣屋瓦翻飛如卷籜驚禽駭獸無處所黃輿欲裂蒼宮薄海濱自昔多颶
風父老祇今皆錯愕孤城屢破血痕腥風鶴喧呼猶膽落天豈驅除此子遺茫茫
吹盡成廣漠風伯飛廉有倦時願君返轡收靈旗高山大壑無轉移於乎四海十
年甲兵不得息風塵瀕洞何終極

海東謠

海東旱三年矣施子過之減騶併食歌促急不成聲竊比於海人之謠云
爾

海中陰火燒扶桑專車魚骨擎為梁截骨為臼舂無糧囓兒忍饑勿夜哭牆頭跳
叫多豺狼

塲丁醴賈無完屋一握黃梁鹽十斛差科絡繹相驅逐前日路死骨未收且緩須
史莫鞭扑

三

黃蒿颯颯風啾啾遺黎眼枯無淚流賣男得錢新買牛墾荒給種聖人出何時親
幸海東頭

太函山房歌寄汪文岫

是司馬伯玉先生孫

司馬文章射雕手武庫森森無不有左拍歷下右婁東寄書萬卷皆蚪蚪騰驤後
勁有聞孫墨汁沉酣作杯酒生事終年寄嘯歌杖藜十載慵趨走山堂舊業大如
拳怪石幽花羅戶牖前坡隙地盡栽茶後圃高墉密插柳客來開甕酌流霞燒筍
烹葵意良厚別君牢落歛三春好事狂吟無恙否練水華屏歙縣二地名魂夢飛蓮華
黃海招邀久送酒王弘旣拂衣遊山謝客空回首狂夫青眼向烟霞肯與侏儒較
升斗他年同上軒轅臺黃山有軒轅臺好揖浮丘作老友

梅母歌

東溪水清淺水流石不轉石邊冬青樹霜落青如故冬青樹高母手栽扶疎百尺

清風來莫言黃鵠悲獨宿將雛繞樹飛徘徊

醉歌送吳錦雯孝廉歸武林

西陵詞客多如麻騰踏開元有數家吳郎傑出晚相見吸盡天台山上霞長安出門塵十斛一日孤眠意亦足如君不厭往來頻肯把新詩借我讀君今年已四十強鬚髯如戟鬢毛蒼誰使燕臺困天馬商歌慷慨摧中腸我有一言君勿忘窮愁萬事緣文章不如拂袖草堂去短棹西湖荷芰香

病中程幼洪翰林李天中給諫各枉餽問

一官鬱鬱暗成疾他人炙手吾抱膝長安車馬豈不多閉門獨坐空悲歌已愁僮僕盡饑色那更參苓充飲食今朝病起憶鱗魚食指蠕動不可得秘書知我有所思為求嘉饌開心脾買得銀鱗箸未下水盤移贈及朝炊同心復有李黃門越陌相存如弟昆江陰子濟來千里蘭陵美酒分一尊病夫匕箸猶未健感此意氣加盤飧吾豈小人懷口腹朋友膠漆古所敦况有新詩療饑渴五侯之鯖何足論

家叔生日聞留滯山陰有作

我今通籍七年餘服官僅滿三百日野人不合遊金門半是艱難半愁疾往事傷

心勿復言坎壈只今猶未畢風塵馬上倦開顏兒女夢中來繞膝薔薇花盡榴花
開愁劇佳辰罷舉杯冠蓋滿堂非骨肉富貴於我何有哉長安達官賤珠玉秋曹
八口憂饘粥憂能傷人人易老歲月遷流如轉轂別時我叔淚霑衣白頭重卧剡
溪曲一觴寥濶三千里顧影茫茫淚相續何如歸向敬亭雲手種桃花偃茅屋

贈湘潭王山長兼謝其作畫障

騷人昔日沈沅湘不意天壤之間有王郎此語雖唐突贈君殊不妨男兒詞翰皆
礪硯安能低頭逐隊無短長愛君有膽大如斗看君用筆如用帚狂吟潑墨勢離
奇豎儒晚笑驚且走我獨披圖盤礴久楚山峭湘水愁風林湛湛九嶷秋記我當
年腸斷處扁舟曾向此中遊

送王懷人亦世兄弟歸漢陽

王家兄弟天下少高歌激楚長安道武昌明月洞庭雲超然出入君懷抱繁花落
盡秋草腓鸚鵡洲邊鷗鷺飛弱冠上書成老大敝裘何處尋漁磯莫學蕭條漢陰
叟掉頭抱甕都忘機

贈嵇叔子孝廉

嵇子淮南客相逢在燕市酒酣耳熱鬢盡張怒決黃河天上水爭言叔夜是前身
誰識荆軻猶未死頻年獻賦又空還蒲帆歸去幾人閒他日高歌攀桂樹思君倘
在八公山

簡方吉偶同年索畫

故人能詩復能畫曾中丘壑籠十洲丹青磅礴渾漫興人言君是顧虎頭我有鶯
溪絹一疋領取烟巒挂蓬室五日一石十日水如何三月不下筆祇今我病愁蹉
跎江上青山歸夢多安能突兀置我層巖絕壑間使我青鞵黃帽影婆娑與君酌
酒為君歌聞君宦遊氣豪壯曾踏龍湫與雁宕不妨潑墨為此圖卧遊想像一惆
悵

張穉恭為余圖白雲樓時奉使祀河歌以送之

我家宛水濱結廬敬亭麓敬亭山上多白雲飛來飛去繞茅屋別來京洛心悠悠
一官又卧白雲樓拄笏西山來爽氣掉頭不敢干公侯張子灑落塵中仙贈我琅
琅金石篇曾吞廣陵濤八九噴作華山千丈蓮

張闡中人
流寓廣陵

懷余百尺樓頭卧揮毫

遣興成雲烟長松古柏半不見迷離碧靄連蒼天馮闌獨立者誰子側耳髣髴聞

清泉如君畫手不易得白石枯枝淡無墨亂山落紙疾如風坐客驚看皆失色君
今四牡指黃河竹西鼓吹重經過白馬玄圭告成事黃鸝紫燕春風多噫嘻其園
竹盡瓠子歌宣房築室今如何歸來圖畫獻 天子與君更醉金叵羅

淮南行送張鞠存同年

張子天官之大夫文章水鑑當代無鳳池螭陛含香趨峻岫玉樹凌天衢少年努
力策高足胡為拂袖歸江湖神龍矯首不得志有時戢角走平地人生富貴風中
塵蓬轉沙飛愁殺人要津挂冠那可得不得爾左遷亦抽身聞說淮南多桂樹枝葉
連蜷暗朝暮半畝草堂桂樹邊八公蹕蹕下烟霧張子自是張李鷹秋風未動思
萼羹留侯晚逐亦松子彭澤豈辱陶淵明如淮之酒百斛傾高歌激楚金石聲東
山捉鼻恐不免請君大笑淮南行

送張友鴻歸雲間

并序

施子官比部與時彥諸公數集友鴻所張譙明許菊溪趙錦帆顧介石吳
六益沈繹堂皆詞學相友者也居無何或遷或出友鴻又別我去僕雖病
其能無一言為作長歌壯之矣

張子十日不相見一日別我去如箭把酒留君君不留笑索新詩當祖餞京華旅
食似君稀文采風流誰不羨丹青已入明光宮詞賦還傳柏梁殿雲間才數不可
當吳子沈子爭翱翔牆東招手顧子出春燈夜雨傾壺觴中州三子各意氣迴鞭
聯轡登君堂祇言醉歌共朝夕誰知轉眼愁河梁燕吳秦豫各分散東西咫尺成
參商張子別我情更苦躊躇把袂九回腸平生好客哀王孫鷓鴣典盡開金樽衆
中許我獨知己紛紛交態聲欲吞長安謁客如叩閭浩然鼓柁歸江村辟疆園亭
頗不惡柴桑松菊今猶存沂吳淞兮斫鱸膾塞薜荔兮紉芳蓀回首它年西北望
應憐方朔老金門

苦雨篇

階前不合蛟龍走瀑布飛騰穿戶牖屢驚驟雨怒翻盆更看飛雹大如斗九衢萬
戶皆洪濤蒼穹下墜潏沔高垣傾壁塌知何限但聞野哭聲嘈嘈我棲客館作官
署屋漏更無容膝處兒童狼藉坐泥中疊架匡牀暫箕踞老夫食性怕炊煤河魚
疾發腹轟雷寸薪尺璧那可得蛙生塵釜空徘徊北窗苦旱南窗苦雨防河掘盡中
州土竹竭山平瓠子愁幽燕又見商羊舞淫淫日夜憂如何海陬未息長鯨波

醉後歌酬趙錦帆兼呈丁飛濤

卧疴一月生秋草久雨柴門跡如掃趙君立馬下階前尊酒論詩恣傾倒君詩橫
絕天下知掉頭不數雕蟲兒同舍為郎執余手愁中相視開鬚眉才雄氣莽天地
窄老蛟怒吼長河圻謂余能不操吳音直是中原一詩伯我友敬禮來西陵揮毫
爛熳如雲蒸君言西署吾曹在三分割據爭峻嶒狂呼不顧旁人笑游佚何妨狎
屠釣王李諸君官陸沈姓字千秋日照耀聞君作令賦甘泉七載囊中無一錢三
年執戟顛毛白當塗誰復知其賢人情惜官不惜才揚雄賈誼終塵埃請君放筆
且掩口明日同歌歸去來

歷下送畢四世副使姚榕似運使同赴官嶺南

君不見太行王屋參天起畢侯墮地稱才子又不見蒼溪浮玉生清光姚家兄弟
爭翺翔當年卧病白雲樓曾同畢子凌高秋手持黃紙向西粵姚生努力相綢繆
兩賢翫辭誰能伍萬古心曾一朝許漂泊聯翩出國門齊州忽集同心侶豪氣真
看岱岳低懽情頗釋樊籠苦左提右挈太殷勤把臂酣歌海內聞璽書一旦九重
下星軺雙指羅浮雲驪駒催人不得駐舞絮回風暗如霧羊城碧草秋更香梅嶺

寒花冬滿樹南粵山川真壯遊翡翠明珠百不愁絳襦仙人天下美銅柱孤標萬載留丈夫踟躕眼前地何如嶺嶠看滄洲滄洲回首穆陵關迢遞風烟不可攀一杯祖爾惜湖上流波別淚兩潺湲

今日行留別王偉樹廉使

王偉樹按察粵西余奉使相接懽甚及北歸聞桂林陷度王不免次豫章值其子往省覲路阻慟哭而返今六年矣王遷粵東左司歸里亡恙而其子已客死賦今日行

今日相逢是何日握手開尊重促膝回想桂林奔迫時欲言嗚咽聲不出桂林疇昔何殷勤忘年爾汝成膠漆許我新詩逼古人執卷高吟散愁疾星巖仙洞憶同遊惆悵懽娛忽相失離江烽火渡豺狼城頭流血殷瀟湘君在圍城余聞道天南地北兩茫茫令子中途驚問訊招魂引領斷人腸誰知玉樹轉摧折白首逢君歸故鄉龍鬚華席鸚鵡研綈袍嗷嗷不可忘人生聚散亦何嘗為君努力傾百觴明日東西征路長

望日樓同楊登州張蓬萊看日出

日初出時一線橫袤長可竟天有頃作方幅稜角色深赤如丹砂已而皎如火外有絳帷浮動眩目萬狀久之赤輪涌出厥象乃圓光彩散越不彈指離海數尺其大如鏡其色如月矣

燭龍夜半開大荒羲和振轡嚴晨裝珊瑚十丈橫天出乍看弦直忽已方動如萬馬颺朱旗爛如金屋堆琉璃皎綃齒苞作帷幃髻鬋隱見無端倪車輪燁燁從中躍赤鳥飛起彩雲落光鈎倒射鼉鼉宮扶桑枝罨蓬萊閣客云日出光不同陰晴百變隨神工連朝霾霧今日霽使君天許開鴻濛數言未畢日千尺翻如素月城頭出天明萬里從此生安得長繩繫白日

蓬萊看海市歌

校士東牟思見海市事竣謁海廟因禱焉翌日臨發海市適見歌以紀之
蓬萊海市光有無玄冬物色誇大蘇我亦再拜乞海若願假靈異看須臾是時苦旱海水竭神龍困懶枯珊瑚鼉鼓忽鳴津吏呼天吳出舞蛟人趨大竹盈盈橫匹練小竹湛湛浮明珠方圓斷續忽易位明滅低昂頃刻殊列屏複帳閃宮闕桃源茅屋成村墟沙門小島更奇絕浮圖倒影凌空虛有時離立為兩人上者為笠下

者車蒼然雙扉開白板中有奇樹何扶疎三山十洲一步地羣仙冉冉來蓬壺神
搖目眩看不足惜哉風伯為驅除人間快意亦如此浮雲長據胡為乎噫嘻浮雲
長據胡為乎

大竹小竹沙門皆島名

東萊贈趙赤霞太守

趙嘗守潤州為處士顧與治完通賦士類多之

使君五馬臨江溪筆剪東吳半江水使君拂衣卧海濱手闢荒園成栗里七尺骺
麟千夫雄坐上客滿尊不空慷慨平生尚遊俠窮愁坎壈成老翁園中嘉樹何歲
蕤海燕徘徊不忍歸酒間袖出故人札數行未畢淚霑衣作詩贈君兼語顧離愁
如緒如烟霧颼風刮海海水飛何時却寄珊瑚樹

東海道中作

行人策馬馬行緩馬上風吹衣帶斷枯桑倒折作飛蓬驚砂走石摩蒼穹海濤怒
嘯蛟人舞飛廉作崇天不雨可憐二麥急甘霖農夫淚濕田間土

禹廟歌

究東禹廟臨汶河凌雲結構何嵯峨棟宇有時橫荇藻旌旗白日驅鼉鼉五月陰
風冷毛髮參天古木交婆娑繁華細葉宿鸞鳳神依鬼護無斧柯後亭更有千年

柏枝是琅玕幹為石化作蒼龍上赤霄頭角鬚髯如刻畫吾聞神龍見尾不見首
此物還能靈異否怪底顏垣苔蘚中夜來風雨聞龍吼

送高阮懷歸里兼訊大美季升杓司幼龍諸子

明湖六月荷花香宛溪故人歸故鄉折柳餞君各未醉憑闌日暮立相望與君少
長生同里共許詞場執牛耳彩毫灼灼耀春葩雙瞳湛湛懸秋水千里綢繆更契
濶論交夜夜燈花落欲歌欲泣君同聲相知不復然疑作子今歸去石城秋明月
秦淮青雀舟桂華窈窕芙蓉發高歌一曲凌滄洲白門歲豐多釀酒青錢三百沽
一斗旋膾鱸魚剝新粟此時還憶勞人否同心更有蔡與梅窮愁襟抱向誰開歸
去相看應大笑新詩一句一傾杯

送戴岵瞻入都

十月錢君歸五月喜君至尊酒復將於顛倒不能寐憶昔奉使雲門遊值君按節
過青州燈前長句為君賦狂歌大叫風颼颼臨歧下馬握余手停杯佇立徘徊久
自言辛苦難具陳不信但看余白首轉眼東西羽翼分京洛淄塵倦趨走何期爾
我相後先同官仍是同門友憐余直道多欽寄開心苦口真吾師加餐相勸廢篇

什此意旁人那得知勞勞余髮亦垂白看爾吐氣開鬚眉
璽書徵拜還青瑣岱雲濟水隨旌旗送君忽憶心所懽
故人同調滿長安欲寄雙魚媿疎懶憑君傳語青雲端

釣突泉送嚴子餐都諫北還

時主考山東

傳聞此泉來王屋伏流倒涌歷山麓寒光噴雪復飛雲
大聲奔雷小碎玉故人黃門天上來崔嵬百尺龍門開
憑陵日觀照滄海咄嗟坐嘯生風雷臨流復有千尋閣
白雪聲名赫如昨黃門揮翰似青蓮更擬新篇致康樂
為君開尊握君手素心海內真良友年將強仕相伯仲
忍使離居成皓首扁舟昨日明湖遊驪歌今日生離憂
君不見濟南七十二泉皆在眼那堪溝水東西流

陸大夫廬母墓雙鸛來巢生二雛有鸛在焉或曰孝所感也繪以傳之

荒丘鬱鬱寒泉深松楸手植成青林中有慈烏口流血哀啼繞樹傷人心
老鸛翱翔下寥廓將雛雙鸛復孤鸛鸛鵲徘徊未忍飛啁啾墓側悲離索
於乎陸大夫鸛兮鸛兮今在無至誠感物理不殊吾母佳城求未得淺葬荒丘天
一隅為君短歌淚霑襦

漢柏行

泰安州
藏廟

根不必踞絕壁枝不必摩蒼天婆娑歡廟眼前樹輪囷屈曲幾千年龍文蛇腹復
猿臂鐵幹蟠空少根蒂岱宗玉女旌旗翻百靈半夜風雨會韋偃畢宏畫不得神
物旁觀空歎息春暮天寒鸛鶴悲陰霞繞樹沈雲黑崔嵬祠廟已頻災唐槐灰燼
秦松摧武皇六龍逝不回嗟爾古柏胡為乎在哉令我哀歌矯首心徘徊

靈巖行

在長
清縣

靈巖開鑿巨靈苦萬仞丹梯作環堵已留天穴爛明星更遣甘泉瀉石乳僧廊側
入洞門深鐵崖涌出袈裟古

鐵片如衣
名鐵袈裟

腹空禿樹飽風霜斗大蒼藤暗烟雨丹臺

飛嵌層巖巔削成石屋居無椽杖藜直上八千仞手撫白鶴凌紫烟朗公卓錫呼

不應龐眉石丈拱我前

山有石如人
立名朗公石

俯視人間悲浩劫誰知梵宇亦桑田般舟寶

殿金銀摧世尊塵埃龍象哀唐碑宋碣紛斷折存者欹側埋荒苔靈蹟摩挲恨未
了倦遊一宿良草草誰能高枕卧空山飽飯青精顏色好

讌歌行

陸使君
席上作

洞房曲室鎖歲蕤華燈綺席紛光輝朱顏窈窕操玉徽笙竽箏笛逸響飛輕風入

戶颺羅幃月何皎皎明星稀樂極含悲知者誰更闌緩帶客忘歸儂歌薄命心徘徊願君懽樂憐春暉

施愚山先生學餘詩集卷之十六終